



UNIVERSITI
PENDIDIKAN
SULTAN IDRIS

اونيورسيتي فنديديقن سلطان ادريس

SULTAN IDRIS EDUCATION UNIVERSITY

A NEW
CREATIVE
VISION

Manifesting Collaborative Creativity



KPG 3013: INSAN GURU PROFESIONAL / PROFESSIONAL TEACHERS

SESI PENGAJIAN: SEMESTER 1 (2022/2023)

KUMPULAN KULIAH KPG 3013: AT20B

PENULISAN REFLEKSI (PASCA)



NAMA	NO MATRIC	NO. HP	PROGRAM
MOHD IZZUL IKHWAN BIN MOHD YUSOF	D20201095609	0197818481	AT20 - IJAZAH SARJANA MUDA PENDIDIKAN (TEKNOLOGI MAKLUMAT)

NAMA PENSYARAH: DR. YUSRI BIN ABDULLAH

SIAPA SAYA SEBAGAI INSAN

Selepas mengikuti kursus Insan Guru Profesional (KPG3013) selama 13 minggu, saya dapat mempelajari banyak perkara baharu yang boleh menjadikan saya seseorang yang lebih baik dalam beberapa aspek. Berdasarkan tugas 1 mengenai siapa saya sebagai insan, saya telah menggambarkan diri saya sebagai sebuah aliran sungai. Hal ini kerana aliran sungai merupakan sebuah keperluan utama dalam kehidupan seseorang. Aliran sungai juga bertanggungjawab dalam memenuhi tanggungjawabnya dalam kitaran alam sekitar seperti membekalkan oksigen, membekalkan sumber makanan dan sebagainya. Hal ini sama dengan keperibadian seseorang iaitu perlu mempunyai sifat bertanggungjawab dalam diri mereka. Semasa menjalani sesi wawancara Insan Guru Profesional, cikgu Asiah telah menekankan bahawa sifat bertanggungjawab perlulah ada dalam diri semua orang sama ada hanya rakyat biasa mahupun penjawat awam. Cikgu Asiah juga telah menyatakan bahawa semua orang sudah semestinya mempunyai tanggungjawab yang tinggi apatah lagi tanggungjawab sebagai seorang guru yang perlu mengorbankan masa, tenaga, kewangan dan sebagainya hanya untuk mendidik pelajar-pelajarnya. Secara keseluruhan, jika seseorang guru itu tidak menjalankan tanggungjawabnya sebagai seorang pendidik yang baik, sudah semestinya ia kan menjejaskan masa depan pelajar-pelajarnya.

Selain itu, sungai juga mempunyai hubungan yang rapat dengan persekitaran semula jadi. Sungai memainkan peranan penting dalam mengekalkan keseimbangan alam sekitar. Dapat kita lihat bahawa sifat bekerjasama sangat penting untuk diterapkan dalam setiap diri untuk membentuk seorang insan yang lebih baik. Sifat kerjasama ialah ciri atau sifat yang menjadikan seseorang itu mampu bekerjasama dengan orang lain dalam situasi yang berbeza. Salah satu kunci utama dalam menjayakan sifat kerjasama ini dalam diri seseorang ialah mempunyai tahap berkomunikasi yang efektif. Hal ini juga telah ditekankan oleh cikgu Asiah semasa menjalani sesi wawancara bersama beliau. Beliau telah menyatakan bahawa bekerjasama sangat penting dalam kesemua persekitaran termasuklah persekitaran di dalam sekolah seperti contoh berkomunikasi sesama guru dan berkomunikasi sesama pelajar. Hal ini penting kerana dengan berkomunikasi, secara tidak langsung ia mewujudkan hubungan yang baik antara rakan sekerja, guru dan pelajar.

Akhir sekali, sebagai seorang insan juga kita perlulah mempunyai sifat prihatin dalam diri. Keprihatinan ialah perasaan prihatin dan empati terhadap keadaan atau masalah orang lain. Ini termasuk menunjukkan keprihatinan dan kesediaan untuk membantu dan memberikan

sokongan emosi. Keprihatinan juga melibatkan pemahaman mendalam tentang keperluan orang lain dan menyediakan penyelesaian atau bantuan yang sesuai. Dalam kes ini, seseorang yang prihatin mempunyai keinginan untuk membuat perubahan positif dalam kehidupan orang lain. Hal ini juga telah ditekankan oleh cikgu Habibah semasa menjalankan wawancara bersama beliau. Beliau menyatakan bahawa apabila pelajarnya mempunyai sebarang permasalahan dari segi pelajaran seperti tidak menyiapkan kerja rumah, beliau tidak mengambil jalan untuk terus memarahi pelajar tersebut namun beliau memahami terlebih dahulu keadaan pelajar tersebut dan cuba untuk membantu menyelesaikan permasalahan pelajarnya dan dari sini kita dapat lihat bahawa sifat prihatin ini sangatlah penting untuk diterapkan apatah lagi sebagai seorang guru yang mewajibkan sifat ini ada dalam diri mereka.

SIAPA SAYA SEBAGAI INSAN GURU PERANTIS

Berdasarkan tugas 1 mengenai siapa saya sebagai Insan Guru Perantis, saya telah menyatakan bahawa ada beberapa sifat yang perlu saya perbaiki sepanjang menjadi Insan Guru Perantis, antaranya ialah dari segi berkomunikasi. Sepanjang saya mengikuti kursus KPG3013 ini, saya telah dapat menambahbaik keyakinan dan keberanian dalam berkomunikasi melalui sesi wawancara dan Projek Santun Masyarakat yang telah dilakukan dibawah kursus ini. Melalui keyakinan dan keberanian dalam berkomunikasi inilah sesi wawancara dan projek “*Tips and Trick Microsoft Office*” telah berjalan dengan lancar dan jayanya. Dengan strategi dan komunikasi yang baik tersebut, saya dapat menyampaikan sesuatu maklumat secara tepat, lengkap dan mudah untuk difahami oleh orang lain. Oleh itu, jelaslah bahawa melalui kemahiran komunikasi inilah yang dapat menentukan bahawa adakah apa yang telah kita sampaikan dapat difahami dengan mudah oleh orang lain dan kemahiran ini sangatlah penting untuk menjadi seorang Insan Guru Profesional kelak.

Selain itu, saya juga dapat meningkatkan dan menambahbaik sifat kepimpinan dalam diri saya. Sebelum saya mengikuti kursus KPG3013 ini, sifat kepimpinan dalam diri saya begitu lemah dan saya kurang yakin akan sifat tersebut. Namun, setelah mengikuti kursus ini, saya dapat menambahbaik sifat kepimpinan saya melalui Projek Santun Masyarakat yang telah dilakukan dalam kursus ini. Projek Santun Masyarakat yang saya telah lakukan ialah “*Tips and Trick Microsoft Office*” iaitu mengajar murid-murid sekolah rendah dan hasil daripada itu saya dapat tingkatkan lagi sifat kepimpinan saya melalui memimpin murid-murid tersebut untuk ikut serta dalam projek ini. Sifat kepimpinan ini merupakan sebuah sifat yang sangat diperlukan

dalam diri seseorang apatah lagi dalam diri seorang guru. Hal ini kerana untuk mendidik pelajar di sekolah, guru memerlukan sifat kepimpinan yang tinggi agar dapat melahirkan pelajar yang lebih berketerampilan dan berwawasan tinggi.

Seterusnya, berdasarkan tugas 1 dalam siapa saya sebagai Insan Guru Perantis, saya telah nyatakan bahawa kita perlu sentiasa menambahkan ilmu pengetahuan. Dalam konteks ini, seseorang perlulah mempunyai keinginan untuk sentiasa menimba ilmu walaupun ia telah bergelar sebagai seorang guru. Hal ini demikian kerana seorang guru tersebut perlu bersiap sedia dengan ilmu tambahan walaupun di luar bidang seseorang guru tersebut dan ini juga telah dinyatakan oleh cikgu Habibah dalam sesi wawancara yang lalu. Oleh itu, melalui kursus ini, saya telah memperoleh banyak ilmu pengetahuan yang baharu antaranya mengenai penggunaan teknologi dalam pendidikan. Teknologi menyebabkan pendidikan berlaku tanpa sempadan dan sebagai seorang insan yang bakal menjadi seorang guru, saya perlu sentiasa mengemaskini kemajuan teknologi agar dapat selaras dengan generasi yang bakal saya ajari nanti.

Akhir sekali, sebagai seorang Insan Guru Perantis kita perlulah menjadi lebih kreatif dan berinovatif. Dalam konteks ini, seorang guru perlu kreatif dan inovatif dalam menghasilkan konten pengajaran yang lebih menarik di dalam kelas. Hal ini juga telah disetujui oleh cikgu Asiah melalui wawancara yang telah dilaksanakan. Cikgu Asiah menyatakan bahawa ciri-ciri yang perlu ada dalam diri seorang Insan Guru Perantis sebelum menjejakkan kaki kearah Insan Guru Profesional ialah mempunyai sifat yang kreatif dan inovatif bagi membolehkan guru mencapai prestasi yang lebih tinggi. Sifat kreatif dan inovatif yang ada pada guru itu, akan mewujudkan pengajaran dan pembelajaran yang lebih menyeronokkan, diminati dan dapat meninggalkan kesan kepada murid dan secara tidak langsung mempengaruhi murid untuk terus belajar. Seseorang guru yang mempunyai kualiti daya usaha tidak akan terperangkap dengan rutin yang membosankan murid untuk belajar. Guru yang mempunyai kualiti profesional ini akan sentiasa memikirkan dan mencuba pendekatan atau kaedah mengajar yang baru supaya pengajarannya sentiasa menjadi menarik dan berkesan.

REFLEKSI KESELURUHAN

Sepanjang saya mengikuti kursus KPG3013 ini, terdapat banyak input yang telah saya perolehi. Sebagai contoh, melalui sesi wawancara Insan Guru Profesional yang telah dilakukan, banyak input yang telah saya perolehi daripada kedua-dua guru yang dijemput semasa sesi

wawancara tersebut. Input yang diberikan oleh kedua-dua guru tersebut amatlah penting bagi menjadikan saya sebagai seorang Insan Guru Profesional pada masa akan datang. Antara input yang telah saya perolehi daripada wawancara tersebut ialah sentiasa membuat persediaan awal terutamanya dalam aspek fizikal dan mental sebelum melakukan sesuatu perbuatan. Persediaan awal terhadap diri seorang guru yang rapi sebelum memulakan kerja adalah bertujuan untuk memastikan setiap produktiviti atau hasil yang diperolehi adalah berkualiti dan dapat menepati objektif pembelajaran yang telah ditetapkan. Ia juga bertujuan agar dapat memastikan proses pembelajaran berjalan dengan baik dan lancar. Oleh itu, sebagai langkah bagi memastikan perjalanan proses pengajaran yang lancar, guru harus bersedia dan mempersiapkan diri sebelum memulakan tugas mengajar.

Penekanan dalam aspek mental ialah seorang guru bukan sahaja hanya perlu melakukan konsep mengajar di dalam kelas tetapi perlu menekankan konsep mendidik murid untuk menjadi insan yang berguna. Menurut cikgu Habibah, mengajar lebih menjurus kepada pembangunan intelektual dan akademik. Manakala mendidik pula membentuk sahsiah atau akhlak dan memerlukan tempoh masa yang panjang untuk membentuk akhlak pelajar yang baik. Daripada aspek fizikal pula, seorang guru perlu mempersiapkan diri daripada aspek penjagaan kesihatan dan lontaran suara agar dapat menarik minat pelajar untuk kekal fokus semasa sesi Pembelajaran dan Pengajaran berlaku.

Selain itu, input lain yang telah saya perolehi hasil daripada wawancara kedua-dua guru ini ialah dari segi pengendalian emosi. Menurut cikgu Habibah lagi, ciri keperibadian yang perlu ada dalam diri seseorang sebelum masuk kedalam bidang perguruan ialah perlu mengendalikan emosi dengan sebaik mungkin. Seorang guru hendaklah menyebarkan suasana persekitaran yang positif seperti sentiasa senyum dan tidak membawa masalah individu ke dalam kelas semasa proses Pembelajaran dan Pengajaran berlaku. Malahan, dengan penerapan ini sudah pasti akan memudahkan seorang guru itu dapat beradaptasi dengan baik terhadap pelajar-pelajarnya dan pihak sekolah.

Input seterusnya yang saya perolehi semasa menjalani sesi wawancara Insan Guru Profesional ini ialah setiap insan ataupun guru perlulah mempunyai minat yang mendalam dalam bidang yang dipilih. Menurut cikgu Asiah, minat yang mendalam inilah yang akan menyebabkan profesion perguruan ini dapat berjalan dengan lebih lancar. Hal ini demikian tugas seorang guru bukanlah hanya mengajar pelajar semata-mata, tetapi lebih kepada mendidik iaitu meliputi kesemua aspek berkaitan pelajar dari sudut membentuk diri pelajar

untuk menjadi insan yang cemerlang bukan sahaja dari aspek pembelajaran, tetapi dari aspek akhlak dan sahsiah pelajar itu sendiri. Cikgu Asiah juga telah memberikan sebuah input yang berharga kepada diri saya iaitu *“kejayaan seorang guru bukanlah terletak pada anugerah yang diberi tetapi pada kecemerlangan muridnya. Kecemerlangan seseorang murid itu merupakan satu kepuasan bagi seorang guru.”*

Bukan itu sahaja, saya juga telah memperolehi input melalui Projek Santun Masyarakat yang telah saya jalani semasa mengikuti kursus KPG3013 ini, antaranya dari segi kepentingan teknologi masa kini. Bersesuaian dengan tajuk projek yang saya lakukan iaitu *“Tips and Trick Microsoft Office”*, kita tidak dapat mengelak daripada perkembangan teknologi yang kian pesat ini. Berdasarkan pernyataan yang telah saya buat diatas, teknologi merupakan sebuah alat yang telah dikembangkan untuk digunapakai dalam dunia pendidikan. Semasa saya menjalani Projek Santun Masyarakat ini, saya telah sedari bahawa teknologi sangatlah membantu dalam pengajaran guru dan pembelajaran pelajar kerana dengan penggunaan alat-alat teknologi seperti komputer, secara tidak langsung dapat menarik minat murid untuk lebih fokus dan tekun dalam pembelajaran mereka. Dengan adanya teknologi yang tiada batas ini, kreativiti dan inovasi dapat dilakukan dalam proses pengajaran dan pembelajaran dan hal ini sangat membantu seorang guru dalam menghasilkan bahan bantu mengajar mereka. Oleh itu, penggunaan teknologi dalam dunia pendidikan perlulah diterapkan lagi agar dapat membentuk pelajar yang celik IT dan memperolehi lebih banyak ilmu pengetahuan.

Akhir kata, melalui kursus KPG3013 ini saya dapat menambahbaik kelemahan-kelemahan yang terdapat dalam diri saya. Saya juga mendapat ilmu baru yang saya akan praktikkan ketika bergelar seorang guru nanti. Tidak lupa juga, saya ingin mengucapkan ribuan terima kasih kepada Dr. Yusri Bin Abdullah selaku pendidik dan pensyarah saya dalam kursus ini atas tunjuk ajar, didikan dan sokongan yang jitu sepanjang saya mengikuti kursus KPG3013 ini.